

Enn Hauch von Weihnachte

Om vergangene Sunndaach hatte merr uns mettem Schorsch unn soim Kättche ferr halb fünf vorm Volksliederbund verabred. Alses dreiverdel fünf war unn die zwaa warn noch nit ze sehe, wollte mir grad e paar Ständ weitergeh, doo steht uff oomol de Schorsch newer uns.

Ei Schorsch, habb ich gesacht, ihr seid spät ...

Ich bin spät, schnauft de Schorsch, dess Kättche kimmt noch. Merr waaß, wonn die ferdich werd ...

Iss was?, hott moi Fraa de Schorsch gemustert, du guckst so komisch. Habbter Krach, ihr zwaa?

Sieht merr mir dess oo?, nickt de Schorsch. Ei weil die sich so long vorm Spiechel erumdriekt, sach ich: Auf mir gehe, weil scheener werrde nimmi! Doo hottse e Schnut gemacht unn ich bin gonge.

Hosde heit koon Dienst?, habb ich gefroocht.

Naa, sacht de Schorsch, gestern war ich droo. Drei Stund Brodworscht grille mett haaße Backe unn kalde Fieß, dess longt. Heit makes die Junge.

Hier uffem Weihnachtsmarkt siehde doch vill Leit, die sich ferr ihrn Verein engaschiern, habb ich gesacht. Wenn de derr vorstellst, wievill Mensche hier schaffe, om Woche-End unn bei dem Nieselwetter, doo musde Hut unn Kapp zieh.

Ja, moont moi Fraa, ess sinn joo nit nur die Vereine. Dess isses, was merr diesjohr uffgefalle iss, die ville Gemeinnützige. Außer Bund, Unicef, Arweiderwohlfahrt konnsde diesjohr sehe Bürger helfen Bürgern, Bürgerstiftung, zwaa Fördervereine, um nor e paar ze nenne – unn alles iss gut besetzt mett Leit, die sich nit zu schad sinn, e paar Stund in ihrm Stond ze stehe. Sogar unsern Beiemooster habb ich geseh.

Ja, habb ich gesacht, dess merkt merr in Flerschem ewe immer mehr, dass vill Gemeinsinn doo iss. Unn ess sinn nit nor die Ältere, aach vill Junge sinn debei. Merr derfe aach all die Leit nit vergesse, die außerdem was mache: die Musiker, de Nikeloos, de Heimatverein – vill von dene werrn nit so beacht, weil die Ständ mett Esse und Drinke halt om meisde belaachert sinn.

Ja, moont de Schorsch, doo habbder recht. Unn all die Leit wolle nit fotografiert werrn, wolle noch nit emol gelobt werrn, weil dess ferr die e selbstverständlich Sach iss – oofach so, weilsen aach noch Spass macht!

Uff oomol sacht die Fraa: Guckemol, Schorsch, doo hinne isses Kättche, die babbelt mett ihrne Schwächerin. Jetzt gehsde hie, gibts ihr enn dicke Kuss unn alles iss widder gut, ja?

Schunn drängt sich de Schorsch dorch die Meng. Zwaa Minutte später isser zurück unn nickt: Sie kimmt gleich.

Unn, froocht moi Fraa, hosde ihr enn Kuss gewwe?

Naa, die Schorsch schittelt soin Kopp, ich wollts joo mache,
awwer ...

Was awwer, habb ichen gestumpt, isse nachtraachend?

Isse nit, grinst de Schorsch, ich wollt ihr joo enn Kuss gewwe.
Awwer wie ich mich zu ihm Gesicht bück, guckt se mich lieb oo unn
haucht: Ach Schorsch! - unn dann habb ich nor: Doo hinne sinn merr!
gesacht. Weil sie hott grad en Langgosch mett Knowweloch gesse!

In dem Aacheblick hott de Musikverein oofonge ze spille unn
de Schorsch sacht: Ach wie schee - endlich enn Hauch von Weih-
nachte!

Eiern Honnes